

### **Кондак 1**

Избранней от всех родов Божией Матери и Царице, явившейся иногда к человеку беззаконну, во еже отвратити его от пути нечестия, благодарственное пение приносим Ти, Богородительнице; Ты же, яко имущая милосердие неизреченное, от всяких нас бед и грехов свободи, да зовем Ти:

Радуйся, нечаянную радость верным дарующая.

### **Икос 1**

Ангели и праведных души удивившася, егда предстала еси пред Сыном Твоим и Богом и многим молением ходатайствовала еси о человеце, присно во гресех пребывающем; мы же, очима веры толикое Твое благоутробие зряще, со умилением взываем Ти сице:

Радуйся, молитвы всех христиан приемлющая.

Радуйся, и самых отчаянных грешников моления не отвергающая.

Радуйся, к Сыну Твоему о них предстательствующая;

Радуйся, нечаянную радость спасения им подающая.

Радуйся, предстательством Твоим весь мир спасающая;

Радуйся, вся наша печали утешающая.

Радуйся, Мати всех Бога, озлобленных души утешающая;

Радуйся, житие наше добре устрояющая.

Радуйся, избавление от грехов всем человеком принесшая;

Радуйся, Радость всему миру родившая.

Радуйся, нечаянную радость верным дарующая.

### **Кондак 2**

Видящи Пресвятая человека, аще и беззаконна, но на всяк день с верою и упованием пред честною Ея иконою долу повергающагося и Архангельское приветствие Ей приносящаго, внят и таковаго грешника славословию, да вси, зряще Ея Матернее милосердие, на небеси и на земли вопиют Богу: Аллилуия.

### **Икос 2**

Разум человеческий воистинну превосходит любовь Твоя к роду христианскому, яко и тогда не престала еси от ходатайства Твоего о человеце беззаконном, егда Сын Твой показа Тебе язвы гвоздиныя, грехи человеческими Ему содеянныя. Зряще Тя толико неотступную Предстательницу за нас, грешных, со слезами вопием Ти:

Радуйся, Заступнице усердная рода христианскаго, от Бога нам дарованная.

Радуйся, Путеводительнице наша к небесному Отечеству нас возводящая.

Радуйся, верных ограждение и прибежище.

Радуйся, помощи всех, призывающих имя Твое святое.

Радуйся, всеми презренных и отверженных от рова погибели исхищающая.

Радуйся, тех на путь правый обращающая.

Радуйся, непрестанное уныние и мрак душевный отгоняющая.

Радуйся, иждившим от недуга ум новый и лучший смысл подающая.

Радуйся, оставленных врачами на Своя всемогущая руке

приемлющая.

Радуйся, нечаянную радость верным дарующая.

### **Кондак 3**

Сила благодати преизобиловала тамо, идеже умножися грех; да радуются на небеси вси Ангели о едином грешнице покаявшемся, поюще пред Престолом Божиим: Аллилуия.

### **Икос 3**

Имущи к роду христианскому Матернее милосердие, всем с верою и упованием прибегающим к Тебе подаеши руку помощи, Владычице, да вси едином сердцем и едиными усты славословие приносят Ти сицевое:

Радуйся, яко Тобою к нам нисходит Божие благоволение.

Радуйся, яко Тобою и мы имамы вящее к Богу дерзновение.

Радуйся, яко во всех бедах и обстояниях наших приносиши Сыну Твоему усердныя о нас молитвы.

Радуйся, яко и наша молитвы; приятными Богу соделоваеши.

Радуйся, яко невидимых врагов от нас отгоняеши.

Радуйся, яко от видимых врагов нас избавляеши.

Радуйся, яко сердца злых человек умягчаеши.

Радуйся, яко от клеветы, досаждения и укорения нас изымаеши.

Радуйся, яко Тобою вся благая желания наша исполняются.

Радуйся, яко много может молитва Твоя пред Сыном Твоим и Богом.

Радуйся, нечаянную радость верным дарующая.

### **Кондак 4**

Бурю внутрь имея греховных помышлений, человек беззаконен моляшеся пред честною иконою Твоею и, видев Кровь, от язв Предвечнаго Сына Твоего потоками, якоже на Кресте, текущую, паде от страха и с рыданием тако вопияше Ти: помилуй мя, о Мати милосердия, да не преодолее злота моя неизреченная благодати и милосердия Твоего, Ты бо еси всем грешником едина надежда и прибежище; преклонися убо на милость, Благая Мати, и умоли о мне Сына Твоего и Творца моего, да непрестанно зову Ему: Аллилуия.

### **Икос 4**

Слышавше небожители о чудеснем молитвами Твоими спасении их земнаго гибнущаго брата, прославиша Тя, благосердную Царицу небесе и земли; и мы, грешнии, сведавше таковое подобнаго нам грешника заступление, аще и недоумеваем язык наш восхвалити Тя по достоянию, от глубины умиленнаго сердца нашего воспеваем Ти сице:

Радуйся, Споручнице спасения грешных.

Радуйся, взыскание погибших.

Радуйся, нечаянная грешных радости.

Радуйся, Предстательнице к Богу, мир от бед спасающая.

Радуйся, яко гласа молитв Твоих беси трепещут.

Радуйся, яко Ангели сему радуются.

Радуйся, яко и нас, земнородных, сила молитв Твоих веселия исполняет.

Радуйся, яко теми от тины грехов нас изымаеши.  
Радуйся, яко пламень страстей наших угашаеши.  
Радуйся, нечаянную радость верным дарующая.

#### **Кондак 5**

Боготечную звезду, чудотворную икону Матере Твоея показал еси нам, Господи, ибо, взирающе на образ Ея телесныма очима, умом и сердцем к Первообразней возвышаемся и Ею к Тебе востекаем, поюще: Аллилуия.

#### **Икос 5**

Видевше Ангели Хранители христиан, яко Божия Матерь споспешествует им в наставлении тех, заступлении и спасении, потщася сие возопити Честнейшей Херувим и Славнейшей без сравнения Серафим:

Радуйся, с Сыном Твоим и Богом вечно царствующая.

Радуйся, Ему всегда о роде христианством моления приносящая.

Радуйся, в христианстей вере и благочестии Наставнице.

Радуйся, ересей и тлетворных расколов Искоренительнице.

Радуйся, от растлевающих душу и тело соблазнов сохраняющая.

Радуйся, от опасных обстоятельств и внезапных смерти без покаяния и Святаго Причащения избавляющая.

Радуйся, уповающим на Тя живота непостыдный конец дарующая.

Радуйся, и по смерти за отшедшую на суд Господень душу пред Сыном Твоим неотступно ходатайствующая.

Радуйся, Твоим Матерним предстательством от вечнаго мучения сию избавляющая.

Радуйся, нечаянную радость верным дарующая.

#### **Кондак 6**

Проповедник чуднаго Твоего милосердия, дарованнаго некоему человеку беззаконну, явился святой Димитрий Ростовский, иже, списуя великая и славная и изрядная дела Божия, в Тебе явленная, предаде письмени и сие дело милости Твоея в научение и утешение всем верным, да и тии, во гресех, бедах, скорбех и озлоблениях суще, многажды на всяк день с верою в молитве пред образом Твоим колена преклоняют и, тех избывше, вопиют Богу: Аллилуия.

#### **Икос 6**

Возсия нам, яко Пресветлая заря, чудотворная икона Твоя, Богомати, прогоняя тьму бед и скорбей от всех, с любовью вопиющих Ти сие:

Радуйся, Целительнице наша в болезнях телесных;

Радуйся, благая Утешительнице в печалех наших душевных.

Радуйся, скорбь нашу в радость претворяющая.

Радуйся, ненадеющихся несумненною надеждою возвеселяющая.

Радуйся, алчущих Питательнице.

Радуйся, нагих одеяние.

Радуйся, вдов Утешительнице.

Радуйся, безматерних сирот незримая Воспитательнице.

Радуйся, неправедно гонимых и обидимых Заступнице.  
Радуйся, гонящих и обидящих правосудная отмстительнице.  
Радуйся, нечаянную радость верным дарующая.

#### **Кондак 7**

Хотя Законодавец Правосудный Господь Сам быти закона  
Исполнитель и явити милосердия Своего бездну, преклонися на  
усердное моление Твое, Преблагословенная Мати Дево, о человеце  
беззаконне, глаголя: закон повелевает, да сын чтит мать. Аз  
Сын Твой, Ты же Мати Моя: Аз Тя должен чтити, послушая Твоего  
моления; буди убо, якоже хочещи: ныне прощаются ему греси Тебе  
ради. Мы же, Видяще таковую силу молитвы Ходатаицы нашей о  
прощении согрешений наших, прославим милосердие и неизреченное  
благоутробие Ея, зовуще: Аллилуия.

#### **Икос 7**

Новое дивное и славное знамение всем верным явися, яко не  
токмо Матери Твоей, но и пречистому Ея лику, на дске  
изображенному, силу чудотворения даровал еси, Господи; сему  
таинству дивящися, во умилении сердца вопием к Ней таковая:

Радуйся, премудрости и благодати Божия откровение.  
Радуйся, веры утверждение.  
Радуйся, благодати явление.  
Радуйся, душеполезных знаний дарование.  
Радуйся, душевредных учений низложение.  
Радуйся, беззаконных навыков нетрудное преодоление.  
Радуйся, слово премудрости просящим дарующая.  
Радуйся, несмысленныя разумныя соделовающая.  
Радуйся, отроком, неудобь учащимся, разум подающая.  
Радуйся, юности благая Охранительнице и Наставнице.  
Радуйся, нечаянную радость верным дарующая.

#### **Кондак 8**

Странное и ужасное видение бысть некоему человеку  
беззаконну, показуя ему благодать Господню, предстательством  
Богоматере грехи его прощающую; сего ради оттоле, исправль  
свое житие, поживе богоугodne. Сице и мы, славная дела и  
многообразную премудрость Божию в мире и жизни нашей Видяще,  
устранимся земныя суеты и излишних житейских попечений и ум и  
сердце наше на небеса возведем, поюще Богу: Аллилуия.

#### **Икос 8**

Вся в вышних пребывающи, и нижних никакоже отступила еси,  
Премилосердая Царице небесе и земли; аще бо по успении Твоем и  
взошла еси на небеса с пречистою Твоею плотию, обаче и грешныя  
земли не оставила еси, являющися причастница Промышления Сына  
Твоего о роде христианstem. Сего ради Тя по долгу ублажаем:

Радуйся, сиянием пречистыя души Твоея всю землю  
просветившая.  
Радуйся, чистотою телесе Твоего вся небеса возвеселившая.  
Радуйся, Промышления Сына Твоего о роде христианstem  
Святая Служительнице.  
Радуйся, о всем мире усердная Предстательнице.  
Радуйся, всех нас при Кресте Сына Твоего усыновившая.

Радуйся, всегда Матернюю любовь к нам являющая.  
Радуйся, всех даров, духовных и телесных, независтная  
Подательнице.  
Радуйся, благ временных Ходатаице.  
Радуйся, двери царствия Христова верным отверзающая.  
Радуйся, и на земли чистаго веселия сердца их исполняющая.  
Радуйся, нечаянную радость верным дарующая.

#### **Кондак 9**

Всякое естество Ангельское удивися делу Твоего милосердия, Господи, яко даровал еси толико твердую и теплую Заступницу и Помощницу роду христианскому, нам невидимо спребывающую, слышащу же Тебе поющих: Аллилуия.

#### **Икос 9**

Ветия многовещанная, но не богопросвещенная суесловят, яко поклонение святому образу аки бы поклонение идолу есть; не разумеют бо, яко честь, святому образу воздаваемая, на Первообразная восходит. Мы же не токмо сия добре ведуще, но и от верных человек о многих чудотворениях от лика Богоматере слышаще, и сами поклонением ему потребная ко временней и вечней жизни приемлюще, с веселием Богородице взываем:

Радуйся, яко от священнаго лика Твоего чудеса деются.

Радуйся, яко утаися премудрость и благодать сия от мудрых и разумных века сего.

Радуйся, яко открылся та младенцем в вере.

Радуйся, яко прославляющих Тя прославляеши.

Радуйся, яко отвергающих Тя пред всеми посрамляеши.

Радуйся, яко от потопления, огня и меча, от смертоносных язвы и от всякаго зла прибегающих к Тебе избавляеши.

Радуйся, яко вся болезни человечести, душевныя и телесныя, милостивно врачуеши.

Радуйся, яко праведный гнев Божий на нас Твоим молением скоро утоляеши.

Радуйся, яко Ты еси тихое пристанище от бурь плавающим по морю житейскому.

Радуйся, яко и по конце житейскаго плаваня нашего надежно приводиши нас в необуреваемую страну царствия Христова.

Радуйся, нечаянную радость верным дарующая.

#### **Кондак 10**

Спасти хотя человека некоего беззаконна от заблуждения жизненнаго пути его, дивное видение от пречестных иконы Твоея показала еси ему, Препоблагословенная, да, чудо видя, покается и, из глубины греховных промыслием Твоим воздвигнутый, вопиет Богу: Аллилуия.

#### **Икос 10**

Стена еси девам, Богородице Дево, и всем к Тебе притекающим, ибо небесе и земли Творец, вселившийся во утробу Твою и от Тебе родившись, яви Тя, Приснодеву, стража девства, чистоты и целомудрия и сосуд всякия добродетели и всех возглашати Тебе научи:

Радуйся, столпе и ограждение девства.

Радуйся, чистоты и целомудрия незримая Охранительнице.  
Радуйся, добрая девам Наставнице.  
Радуйся, невест благая Украсительнице и Споручнице.  
Радуйся, всежеланное совершение благих супружеств.  
Радуйся, матерей детородящих скорое разрешение.  
Радуйся, младенцев воспитание и благодатное охранение.  
Радуйся, безчадных родителей плодами веры и Духа  
веселящая.  
Радуйся, матерей скорбящих утешение.  
Радуйся, тайное веселие чистых дев и вдовиц.  
Радуйся, нечаянную радость верным дарующая.

#### **Кондак 11**

Пение всеумиленное приносяще Ти, недостойнии, просим  
Тебе, Дево Богородице: не презри гласа рабов Твоих, к Тебе бо  
в напастех и скорбех прибегаем и пред Тобю в бедах наших  
слезы проливаем, поюще: Аллилуия.

#### **Икос 11**

Светоподательную свещу, сущим во тьме греха и юдоли плача  
явившуюся, зрим Святую Деву; духовный бо огонь молитв Своих,  
наставления и утешения возжигаящи, приводит к Свету  
Невечернему всех, воззванию почитающих Ю сими:

Радуйся, лучю от Солнца Правды, Христа Бога нашего.  
Радуйся, нечистую совесть просвещающая.  
Радуйся, тайная и неудобь предвиденная вся добре ведущая и  
имже подобает сказующая.  
Радуйся, лживых провидцев и суетная гадания посрамляющая.  
Радуйся, в час недоумений мысль благу на сердце  
полагающая.  
Радуйся, в посте, молитве и богомыслии пребывающим присно  
спребывающая.  
Радуйся, верных пастырей Церкви ободряющая и вразумляющая.  
Радуйся, богобоязненных иноков и инокинь присное утешение.  
Радуйся, кающихся пред Богом грешников непостыдная  
Заступнице.  
Радуйся, всех христиан теплая Ходатаице.  
Радуйся, нечаянную радость верным дарующая.

#### **Кондак 12**

Благодать Божественную испроси нам у Сына Твоего и Бога,  
прости нам руку помощи, отжени от нас всякаго врага и  
супостата, умири нашу жизнь, да не погибнем люте, без  
покаяния, но прими нас в вечныя кровы, Богородительнице, да  
радующеся поем Богу, Тобю нас спасающему: Аллилуия.

#### **Икос 12**

Поюще неизреченное Матернее Твое милосердие к человеку  
беззаконну, восхваляем Тя вси, яко твердую Предстательницу за  
нас, грешных, и поклоняемся Тебе, о нас молящейся; веруем бо и  
уповаем, яко испросиши у Сына Твоего и Бога благая временная и  
вечная всем, с любовью вопиющим Ти сице:

Радуйся, всех наветов и искушении, от мира, плоти и  
дьявола; находящих, поправление.

Радуйся, нечаемое примирение ожесточенно враждующих.  
Радуйся, неведомое исправление нераскаянных грешников.  
Радуйся, изнемогающих от уныния и печали скорая  
Утешительнице.  
Радуйся, благодатию смирения и терпения нас снабдевающая.  
Радуйся клятвopеступлений и неправедных стяжаний  
всенародное обличение.  
Радуйся, от домашня брани и вражды единокровныя миром и  
любвию ограждающая.  
Радуйся, от пагубных начинаний и несмысленных пожеланий  
нас незримо отвращающая.  
Радуйся, во благих намерениях наших присная Споспешнице.  
Радуйся, в час кончины всем нам Помощнице.  
Радуйся, нечаянную радость верным дарующая.

### Кондак 13

О Всепетая Мати, невместимаго Бога во чреве вместившая и  
Радость всему миру родившая Нынешнее прими пение, вся наша  
печали на радость преложи и от всякия избави напасти всех и  
будущия изми муки, о Тебе вопиющих: Аллилуия.

**Этот кондак читается трижды, затем 1-й икос «Ангели и  
праведных души...» и 1-й кондак «Избранной от всех родов...».**

### **Молитва Пресвятой Богородице перед Ея иконой, именуемой «Нечаянная радость»**

О Пресвятая Дево, Всеблагаго Сына Мати Всеблагая, града и  
Святаго храма сего Покровительнице, всех сущих во гресех,  
скорбех, бедах и болезнях верная Предстательнице и Заступнице!  
Прими молебное пение сие от нас, недостойных раб Твоих, Тебе  
возносимое, и якоже древле грешника, на всяк день многажды  
пред честною иконою Твоею молившагося, не презрела еси,  
даровала, еси ему нечаянную радость покаяния и преклонила еси  
Сына Твоего многим и усердным к Нему ходатайством к прощению  
сего грешнаго и заблудшагося, тако и ныне не презри моления  
нас, недостойных раб Твоих, и умоли Сына Твоего и Бога нашего,  
да и всем нам, с верою и умилением покланяющимся пред  
цельбоносным образом Твоим, дарует нечаянную по коегождо  
потребе радость: грешником, погрязшим во глубине зол и  
страстей, вседейственное вразумление, покаяние и спасение;  
сущим в скорбех и печалех утешение; обретающимся в бедах и  
озлоблении совершенное сих избытие; малодушным и ненадежным  
надежду и терпение; в радости и изобилии живущим непрестанное  
Благодетелю Богу благодарение; бедствующим милосердие; сущим в  
болезни и долгонедужии и оставленным врачами нечаемое  
исцеление и укрепление; иждившим от недуга ум ума возвращение  
и обновление; отходящим в вечную и нескончаемую жизнь память  
смертную, умиление и сокрушение о гресех, дух бодр и твердую  
на милосердие Судии надежду.

О Госпоже Пресвятая! Умилосердися о всех чтущих  
всечестное имя Твое и всем яви всемогущий покров Твой и  
заступление: во благочестии, чистоте и честнем жительстве  
пребывающия до скончания их во благости соблюди; злыя благи  
сотвори; заблудшия на путь правый настави; всякому делу  
благому и Сыну Твоему угодному споспешествуй; всякое дело злое



и богопротивное разруши; в, недоумении и трудных и опасных обстояниях обретающимся незримую помощь и вразумление с небесе ниспосли, от искушений, соблазнов и погибели спаси, от всех злых человек и от врагов видимых и невидимых защиты и сохрани; плавающим сплавай, путешествующим спутешествуй; сущим в нужде и гладе буди Питательница; неимущим крова и пристанища буди покров и прибежище; нагим подаждь одеяние, обидимым и неправедно гонимым заступление; клевету, поношение и хуление терпящих незримо оправдай; клеветники и хулители пред всеми обличи; ожесточенно враждующим нечаемое подаждь примирение и всем нам друг ко другу любовь, мир, и благочестие, и здравие с долгоденствием.

Супружества в любви и единомыслии сохрани; супруги, во вражде и разделении сущия, умири, соедини я друг ко другу и положи им союз любви неразрушимый; матерем детородящим скорое подаждь разрешение, младенцы воспитай, юныя уцеломудри, отверзи им ум к восприятию всякаго полезнаго учения, страху Божию, воздержанию и трудолюбию настави; от домашня брани и вражды единокровных миром и любовию огради; безматерних сирот буди Мать, от всякаго порока и скверны отврати я и всему благому и богоугодному научи, прельщенные же и во грех и нечистоту впадшия, скверну греха отъявши, из бездны погибели изведи; вдов буди Утешительница и Помощница, старости буди жезл; от внезапныя смерти без покаяния всех нас избави и всем нам христианскую кончину Живота нашего, безболезненну, непостыдну, мирну и добрый ответ на Страшном Судищи Христове даруй; преставльшиися в вере и покаянии от жития сего со Ангелы и всеми святыми жити сотвори; скончавшимся внезапною смертию милостива быти Сына Твоего умоли и о всех усопших, иже не имеют сродников, о упокоении их Сына Твоего умоляющих, Сама буди непрестанная и теплая Молитвенница и Ходатаица, да вси на небеси и на земли ведят Тя, яко твердую и непостыдную Предстательницу рода христианскаго, и, ведуще, славят Тя и Тобою Сына Твоего, со Безначальным Его Отцем и Единосущным Его Духом, ныне и присно и во веки веков. Аминь.

**Тропарь Пресвятой Богородице перед Ея иконой, именуемой  
«Нечаянная радость»**

**Тропарь, глас 4:**

Днесь, вернии людие, духовно торжествуем, прославляюще Заступницу усердную рода христианскаго, и притекающе к Пречистому Ея образу, взываем сице: О премилостивая Владычице Богородице, подаждь нам нечаянную радость, обремененным грехми и скорбьми многими, и избави нас от всякаго зла, молящи Сына Твоего, Христа Бога нашего, спасти души наша.

**Кондак, глас 6:**

Не имамаи иныя помощи, не имамаи иныя надежды, разве Тебе, Владычице. Ты нам помози, на Тебе надеемся, и Тобою хвалимся, Твои бо есмы раби, да не постыдимся.

**Величание**

Величаем Тя, Пресвятая Дево, Богоизбранная Отроковице, и чтим образ Твой святой, имже точиши исцеления всем с верою



притекающим.

Празднование 1/14 мая и 9/22 декабря